



V. *Nouvo* Vizyon

Newsletter - Vol. 20 Nimero 15 (27 Oktob 2011)

SNP i siport

Prosesis Demokrasi

Apre 12 eleksyon depi retour multi-parti, tou dimoun i dakor ki nou pei i bezwen angaz li dan en nouvo prosesis demokratizasyon. Sa i enportan aköz nou pei i bezwen avans devan. Avek sa sistenm ki nou annan kot lapreferans, viktimizasyon ek medyokrite i kontinyen renye, nou pa pou ariv lwen dan nou devlopman. Nou bezwen vre demokrasi. SNP i debout lo kote tou reprezantan lopoziyon pou siport sa mouvman pour nou met laplenn nivo dan nou pei. Fodre ki Sesel i ranport en vre laviktwar dan sa prosesis.

Termin diskriminasyon dan Sesel

Seselwa i fatigue ganny divize ant 'zot' ek 'nou'. Depi 1977, i kler ki serten i krwar ki sa pei i pour zot e ki lezot ki annan en fason panse ki diferan napa drwa eksprim li oubyen ni menm annan en fason panse pour zot menm. Se sa ki anmenn en diskriminasyon ki a son tour i anmenn divizyon. Nou pe demande ki bann tel latitid i arete e ki sakenn i ganny respekte pour sa ki ete tan ki i obzerv lalwa e pa fer nanryen ki ilegal. Sa i en lot fason pour nou avans devan koman en pep e en nasyon. I bann tel fason panse e azir ki pou fer nou pei reganny son valer moral.

Annan menm lalwa pour tou

Aret diskriminasyon i osi vedir ki koman en pei nou fer sir ki lalwa i aplik pour tou dimoun dan menm fason. I pa kapab ki serten i azir konmsi i par lao lalwa e fer sa ki zot anvi, ganny tou privez e touzour pe byen pase, tandi ki lezot i fer fas avek montanny difikilte apre montanny difikilte. Tou lalwa, ki i konsern taks, lakaz, ledikasyon, drog, lasante, travay, etc... i bezwen aplik pour tou dimoun dan menm fason e annan menm privez ou sanksyon pour tou. Se sa ki nou anvi.

Dirizan e pa Dominer

Letan nou pe koz lo termin sa bann latitid ki pa akseptab dan nou pei, nou pe demande ki nou ganny bann dirizan ki pa war zot koman bann lanperer ek bann dominer. Nou anvi bann vre dirizan ki regard konsern sa pep Seselwa e travay pour byennet nou pei tou anprenan kont sak endividi dan menm fason. Sa prosesis demokratizasyon pou permet nou avans devan e tret nou pep dan en bon fason olye ki bann dirizan i krwar ki zot bezwen diriz dan en fason dominer zis pou reste o-pouvwar e fer dimoun viv dan lafreyer.

Laliberte ek Prosperite pour Sesel

Seselwa i anvi respir ler laliberte e partaz dan larises son pei. Nou tou nou anvi en meyer lavi. Sel fason pour nou kapab avanse lo sa semen se atraver rekonnèt ki ozordi nou demokrasi pe fer aryer e ki nou bezwen fran avek nou lekor e anbank lo bann reform vreman profon e serye. Napa en sel parti politik oubyen detrwa endividi ki annan tou drwa dan sa pei. Sesel i pour nou tou. Alor SNP i swete ki avek sa an-tet, Sesel i ava trouv semen progre e tou Seselwa i ava anbras lademokrasi e zanmen nwa larg li ankor.

Konvansyon Madanm 5 Novanm - ICCS

Lasosiasyon Madanm SNP pe organiz zot konvansyon aniel Sanmdi le 5 Novanm a-parti 3er kot ICCS. Sa levennman tre enportan pou en moman kot bann madanm i regard zot program e planifye zot aktivite pour lannen 2012. Tou madanm i ganny envite pou partisipe.

Anba direksyon Mrs Regina Alcindor, en madanm solid e lwayal, sa lorganizasyon madanm in kapab met dekote bann sours divizyon e travay byen for pour nou parti. Ozordi nou lasosiasyon i ganny rekonnèt lo nivo enternasyonnal.

I enportan note ki anba direksyon Mrs. Alcindor, nou lorganizasyon in ganny reprezante lo nivo Lafrik, atraver Africa Liberal Network. Vi son gran kontribisyon, Mrs. Alcindor ti ganny envite pou reprezant lorganizasyon madanm kot Konvasyon bann

LibDems an Birmingham, Langleter.

En lorganizasyon enternasyonnal 'Inter Press Africa, ti sitan enpresyonnen avek devouman nou lasosiasyon ki en proze avek tit 'Engaging Women in Politics' ti ganny aprouve e nou lasosiasyon ti ganny finansman pou organiz en konferans pour bann madanm isi dan Sesel.

Atraver sa konferans, bokou plis madanm in vin devan pou angaz zot dan politik, e SNP pe apiy zot e nou swete ki dan lavenir o-mwen 50% bann kandida dan en eleksyon i ava madanm.

Nou vremen ankouraze avek travay nou bann madanm. Nou envit tou madanm ki santi li konsernen e angaze pou asiste sa konvansyon tre enportan. Nou kont lo zot sipor. Lavwa madanm pou ede anmenm sa sanzman nesaser dan nou sosyete. Nwa zwenn zot laba.

Aret Abiz Resours Leta pour lavantaz Politik

Labi resours leta i enn bann teknik ki Parti Lepep ek son bann predeseser lin servi pou reste o-pouvwar. Zot servi byen leta dan diferan fason. Swa zot servi larzan leta dan en fason direk, oubyen zot servi fasilite leta pour zot lavantaz, oubyen pli pir ankor, zot kontrol bann servis leta konmsi sa ti zot byen personel oubyen pour zot parti. Tou sala i apel labi resours leta pour lavantaz politik e fodre ki i arete dan nou pei.

Sa labi i komans avek sef pei limenm. Pandan 2 kanpanya nou'n war Mr. Michel

koman dirizan Parti Lepep pe servi State House koman biro Parti Lepep. Program politik in ganny fer laba, bann posters ek bord Parti Lepep in ganny fabrike laba, telefon ek lezot resours leta, enkli travayer leta in ganny servi pou promot li personelman, son kandida oubyen Parti Lepep.

Pandan sak eleksyon nou war biro ladministrasyon distrikt osi ganny transformen dan biro brans Parti Lepep. DA ek son lekkip i vin bann aktivis oubyen kandida menm. Zot fer kanpanya dan tou fason. Zot oublie ki zot form parti resours leta e alor zot pa devret

ganny servi pou donn lavantaz politik en parti politik atraver zot travay.

Letan Mr. Sebastien Pillay i sorti koman en Sekreter Prensipal State House e vin en MNA SPPF lo baz proporsyonnel, eski pa i kler ki son travay State House ti osi annan politik, e alor ti en labi resours leta? Lekel sa fou-bet ki pou krwar ki i tya pe fer zis travay leta e non pa travay politik pour Parti Lepep?

Nou demande ki tou sa bann sitiasyon i byen ganny analize. Se sanmenm bann baryer dan nou progre. Briz sa bann baryer, servi byen resours leta e nou ava fer progre.

Michel pe okip zis Parti Lepep

Mr. Michel ek Parti Lepep i pran gran plezir pou zve avek pep Seselwa. Dan sak lokazyon piblik ki zot gannye, zot fer nou krwar ki tou dimoun i kapab monte dan sa pei. Malerezman pour zot, zot aksyon i koz lekotrer e nou war ki mannyer zot servi politik koman en kriter e met siporter Parti Lepep dan tou pozisyon enportan.

Ziska prezan nou'n war sa bann lapwentman swivan dan gouvrenman: Vicky Theresine in vin nouvo CEO Konsey Lazenés, en lorganizasyon ki sipoze regroup tou zenn Seselwa. Sa madanm fek sorti dan Lasanble kot in maltret tou lopolizasyon, e se li ki fek responsab pour bann PPB Parti Lepep.

François Joseph i fek ganny apwente Sef Protokol. Li osi i fek sorti koman en MNA e i ti enn ki ti pli maltret lopolizasyon.

Eski zot ekspekte nou krwar ki sa bann dimoun i enparsyel e endepandan? Hahahaha!

Laport Deryer osi i Fermen pour PDM

Depi le 1 Oktob, nou ti dir avek PDM ki konte i bon, me ki se koko ki zot manke. Zot pa ti oule aksepte ki zot napa en plas dan Lasanble e alor zot ti esey rantre par laport deryer. Mardi, menm zour ki Gadafi ti ganny antere dan dezer, Lakour Konstitisyonnel ti osi anter PDM. Sa i osi montre ki menm laport deryer in fermen. I kler alor ki David Pierre pa pou zanmen ganny en eleksyon dan Sesel. Nou espere i konpran sa tre byen aprezan.

Sa ki malere dan sa zafer se ki in mal ganny konseye par bann swadizan gran savan. Lo en kote, Parti Lepep in ankouraz li pou tay deryer en lafimen, e lo lot kote son avoka ek Atorni Zeneral in donn li tro bokou lespwar. Zot ti devret realis e aksepte ki lalwa in byen ganny enterprete.

Atorni Zeneral in vin avek bann largiman pli bet ki posib. Byensir dimoun ki ganny

elekte direkteman i ganny elekte dan en diferan fason ki manm proporsyonnel. Sa diferans i vin dan zot non limenm. Eski Mr. Govinden i realize ki sak MNA proporsyonnel Parti Lepep i vo 5000 vot? Lekel sa MNA ki'n ganny elekte direkteman ki'n ganny 5000 vot dan okenn eleksyon?

I ti devret osi mazinnen ki se Konstitisyon limenm ki'n etabli sa bann diferan standar e fason kalkil keksoz. Me dimoun pe osi demande akoz i pa ti defann Komisyon Elektoral? Eski se pa li ki abitye reprezant Mr. Gappy? Eski ya pe dir nou sa son nouvo stil, oubyen gouvrenman menm pe perdi konfyans dan li? I kler i devret ale apre sa performans.

Nou espere ki sa zafer i fini la, e zot realize nou Lasanble i dan en kriz. Laplenn pa nivo. Fer bann reform e donn nou pei en vre demokrasi. Apre nou ava kapab ganny en vre Lasanble Nasyonnel e pa sa Karikatir aktyel.

PAS PARTOU

Rankont State House in fini?

Tou-l-tan nou ti dir zot ki prensip SPUP/SPPF/Parti Lepep se 'Servi, apre zete.' Zwer in fini komans santi doz sa pwazon, la ki i pa'n delivre sa ki i ti promet. I komans trouv li dan difikilte. Deryen difil ki i tya pe anpandan avek ti kes an-kour. Me la ki zafer in al dan lot direksyon, letan i telefonnen, State House i komans pa reponn. Ki deal???

Lo Bus Stop Pour Festival Kreol?

Zour louvertir Festival Kreol, dimoun ti war Jane lo bus stop pe tranp ek Tata pou desann anvil. Ki'n arive avek loto nef vit nwan? Ki mannyer nou konpran in fini kraze! Me zot, David fek tir en gro jeep, e pas loto ek Davidson, me kit ou ater? Nou demande ki mannyer sa zafer parti konvenyans pou fini?

Serten pa ni konn Lasanble

I ti vreman malere pou antann serten MNA nouvo Lasanble pe dir ki zanmen zot in menm al dan Lasanble. Sa i vedir zot tya pe fer laplikasyon pou travay ki zot pa konn fer!

Konvansyon SNP

Tou manm SNP i ganny enformen ki zot kapab kolekte form nominasyon pour eleksyon Komite Ekzekitiv kot biro Arpent Vert.
Tou form fodre retourn kot biro avan Lendi le 7 Novanm.
Konvansyon pou fer Dimans le 20 Novanm kot Sant Konferans.

SNP - Commitment to Democracy